

## Titus Roube'aten Ana Tur

Titus i Ufun Orot baise tur gewasin nonowar ufunamaim dogoron ikitabir na Kirisiyan matar. Naatu Paul ana bowabowamaim ikofan ana baibaisayan orot matar hairi hima hibow. Paul ana fef i ana baibaisayan orot wabin Titus ihamiy Kurit imaim ma ekaleisia ana bowabow iukwarin bowabow isan kirum iyafar. Fef wanawanan i tur buh etei tounu ana not imaim ya kirum.

Wanatoro'orot i Titus nuhin kusib ekalesia ana bonawiyenayan orot ana yawas sabuw matahima'im i boro gewasin nasinaf, ana itinin ta i Kurit sabuw kakafih wanawanahima'im i nabat gewas. Bairu'abin ekalesia kou'ay ta ta wanawanahima'im bai'obaiyen ana efamaim regaregah, baibina'ah ni'obaiyih (saise i auman baibin boubuh hini'obaibiyih) orot boubuh naatu akir wairafih. Baitaunin Paul Titus ana binan itin Kirisiyan ana yawas isan, dogoron tufuw nama, taituwan bairi hinita'ay gewas naatu gamin kwanekwan, kouseseb ekalesia wanawanan baibobowen kakafih i nahaiwen.

### **Fef wanawanan tur iti na'atube hi'asgidigid**

Roube'aten ana tur (1.1-4)

Ekalesia ana bowayah ukwarih (1.5-16)

Ekalesia wanawanan kou'ay ta ta hai bowabow (2.1-15)

Gewasin sinaf ana fefeyan naatu baimatnuwen (3.1-11)

<sup>1</sup> Ayu Paul God ana akirwairafin naatu Jesu

Keriso ana tur abarayan. Baitumatum, turobe ana so'ob bonawiyit God ana efamaim ma, naatu God ana roubinen sabuw baibaisih hai baitumatum baira'atin isan yasairu. <sup>2</sup>  $\diamond$ Naatu it ata nuhifot i yawas wanatowan tafanamaim ebitutut. Anayabin turobe ana God tafaram matara'e ana veya ana omatanen yai. <sup>3</sup> Taiyuwin ana veya yakinifuw inu'in baib ana maramaim ana tur iwa'an irerereb ayu abibinan wanawanan. Iti obaiyunen tur i God ata baiyawasenayan ayu itutumu itu.

### *Titus Ana Bowabow Kuritamaim*

<sup>4</sup>  $\diamond$ Titus o ayu natu anababatun baitumatum ta'immon wanawananaaim. Isa ayoyoyoban Tamat God naatu Jesu Keriso ata baiyawase-nayan manaw kabeber, tufuw nit. <sup>5</sup> Ana'an iti isan o ahamiy Kurit kuma'am saise abis-tanawat men tabisaware o inayabuna naatu marisika au'uwi na'atube bar merar ta'ita'immon hai ukwarih inarubiniyih. <sup>6</sup>  $\diamond$ Orot yait aurin ubar en na'at, aawan ta'immon, natunatun bosunusunubayah, men yah so'aso'arin, men baifanasairayah. <sup>7</sup> Anayabin Orot ukwarin God itumitum bowabow itin ana sabuw kaifih isan, aurin men ubar nama, men taiyuwin na'it ra'ah, men yan so'aso'arin, men harew fokarin tomayan, men fais robayan, naatu men sawar ana kabat. <sup>8</sup> Baise orot babin hai merar nay nabuwih, gewasin nasinaf, not wairafin, ana ef mutufurin, naya'asair kakafiyinamaim nama, taiyuwin narumutufur. <sup>9</sup> Bosunusunub isan

---

$\diamond$  **1.2:** Col 1.27     $\diamond$  **1.4:** Rom 1.7; 2Cor 8.23; Gal 2.3     $\diamond$  **1.6:**  
1Tim 3.2-7; 2Tim 2.24-26

ana tur hibi'obaiy na'atube i nabukikin saise nati'imaim tur ana kirikirifotamaim i karam boro fair nab sabuw koufair nitih naatu sabuw iyab tibi'aw'ase'as boro nakwararih. <sup>10</sup> ◊Anayabin sabuw maumurih na'in i baifanasairayah, okwanekwaneyah naatu baifufuwenayah, itinin ta sabuw hai ar afu'afuw kwa wanawanamaim tema'am na'atube. <sup>11</sup> ◊Gewasin nati sabuw awah kwanasakirafut, anayabin bar awan awan hirun hitit baifuwenamaim sabuw tibi'obaiyh, saise nati'imaim i sawar wairafih hinamatih hinama gewas isan. <sup>12</sup> Taiyuwih hai dinab orot iti na'atube hio, "Kurit sabuw i mar etei baiwuwenayah, sigarafor, nokonokow yah wiruw." <sup>13</sup> ◊Sawar iti isah sif hirurubon i turobe, isan imih tur fokarin kwanakwararih kwana'uwih, saise hai baitumatum nare baron na'of, <sup>14</sup> ◊men Jew sabuw hai binanakwar hinanowar naatu men sabuw iyab turobe hikwakwahir hai obaiyunen tur hinanowaramih. <sup>15</sup> Sabuw iyab tikukubaituturih hai sawar etei boro gewasih, baise sabuw iyab biyah karitanin naatu men tibitumatum hai sawar etei boro men ta gewasin, hai not naatu hai naniyan etei hibokarit. <sup>16</sup> ◊Hai turamaim i God hiso'ob, baise hai sinafumaim i God teyayaub, hai yawas tenakuyakuy naatu baifanasairayah, hai fanasair ra'at, hai mumunin sawar men karam boro bowabow gewasin hinasinaf.

## 2

### *Bai'obaiyen Tur An Anatutut*

---

◊ **1.10:** 1Tim 4.7   ◊ **1.11:** 2Tim 3.5-6; 1Pet 5.2   ◊ **1.13:** 2Tim 4.2   ◊ **1.14:** 1Tim 4.7   ◊ **1.16:** 1Jn 1.6; 2.4

**1** Baise Titus, o tur anababatun hio baibasitamaim inu'in na'atube ini'obaiyih.  
**2** Regaregah ini'obaiyih, yateh nanub hinakaifih gewas, taiyuwih hina rumutumutufurih, hai not narerekab, abisa baibasitamaim inu'in hinabukikin baitumatum, yabow naatu wainabenamaim hinama **3** ♫Na'atube baibina'ah hai tur ina'owen, hai yawas hinaya'asair, men hinayanuw, men harew fokarih tom isan nayewra'ahih, baise sawar gewasih hini'obaibiyih, **4** saise baibin baubuh koufair hinitih aa'awah oro'orot hiniyabuwih naatu natunatuh auman hiniyabuwih. **5** ♫Naatu hai not narerekab, hinakubaitutur baibin gewasih hinamar bar ana bowabow hinasinaf, a'awah fanah hinab, saise boro men yait ta God ana tur ni'ib tur kakafin na'omih. **6** Tur ta'imona ban oro'orot baubuh koufair initih hai not narerekab. **7** ♫A bowabowamaim sawar tutufin etei inabosunusunub itinin gewasin inamatar, bai'obaiyen wanawanan turobe not gewasin anababatun ini'obaiyih, taiyuw initurobe nati bowabow isan. **8** ♫Tur gewasinamak inao sabuw iyab tur tibigim awah naha'e, saise baigegeyah boro biya'ohow hinab naatu boro men tur kakafin hina'uwitamih. **9** ♫Akirwairafih sawar tutufin etei hai orot ukwarih teo na'atube fanah hinab hinasinaf, bowabow gewasin hinabow hai orot ukwarih hiniyasisir, men awah hinayafutifut, **10** men hai sawar ta'imona rou'ab hinitait, baise hai bowabowamaim itinin gewasin hinasinaf hinitutumih, saise sawar

♫ **2.3:** 1Tim 3.11   ♫ **2.5:** Eph 5.22   ♫ **2.7:** 1Tim 4.12   ♫ **2.8:**  
 1Pet 2.15   ♫ **2.9:** 1Tim 6.1

etei hai sinafumaim God ata baiyawasenayan ana bai'obaiyen boro itinin gewasin namatar. **11** Anayabin God ana manaw ana kabeberamaim sabuw baiyawasih isan i na irerereb. **12** **◊**Naatu ebi'obaiyit, ma kakafih, tafaram ana naniyan kakafih tanakwahir, naatu ma gewasin, ma mutufurin, God ana kokomaim ma iti boun ana veya tanab, **13** nuhit nafot ereyasisir tanama ata God gagamin naatu ata baiyawasenayan Jesu Keriso bonamanamarin enan tanakaif. **14** **◊**I taiyuwin it ata efan bai morob, saise ata yawas kakafihine tama'am tubunit, naatu takusouwit i ana sabuw nowan anababatun tatamatar tatabomoremorer bowabow gewasin tatabow. **15** **◊**Titus, sawar iti etei'imak sabuw ini'obaibiyih koufair initih naatu inakwararih inarumutufurih. A fair ibaib na'atube inabow. Men yait ta o nanuwfuruw.

### 3

#### *Kirisiyan Hai Yawas*

**1** **◊**Hai not inakusib sabuw iyab hi'ukwarin tebobonawiyih babahaim hinema, hinifan-abow, bowabow etei isah hinanowarasit hin-abow gewas. **2** Men yait ta isan tur kakafin hinao, baise dogoroh wanawanan tufuw nama, gamin kwanekwan hinahaiw, taiyuwi hinayara'iyyih taituwah bairi hinibegon gewas hinema naatu kakaf sabuw hini'obaiyih. **3** **◊**Anayabin it auman

**◊ 2.12:** 1Jn 2.16    **◊ 2.14:** Exo 19.5; Deu 7.6; Ezk 37.23; Gal 1.4;

1Pet 2.9    **◊ 2.15:** 1Tim 4.12    **◊ 3.1:** Rom 13.1-7; 1Pet 2.13-14

**◊ 3.3:** 1Cor 6.9-11; Eph 2.1-2; 5.8

marasika nati na'atube ata not hikwaris, tabifanasair, hibifufuwit, sawar kakafih yumatah ta ta biyat ana yasisir isan fatumit, kakafin wanawanahan tama'am, tabahiy kwanekwan, dogorot wanawanahan baifa'efa'en awan karatan, naatu taiyuwit nena taifa'ifa'it. <sup>4</sup> Baise God ata baiyawasenayan ana kabeber naatu ana yabow yara'iy na birerereb ana maramaim <sup>5</sup> ◊ata kakafihine iyawasit. Men bowabow gewasin tasisinap isan iyawasitamih, baise i ana kabeberaim yawas itit harewamaim ikifuwit tatufuw maiye. Naatu Anun Kakafiyinamaim ata yawas iwa'an boubun matar. <sup>6</sup> ◊Iti baitinin gewasin maiyow tafatamaim isuwai re ata baiyawasenayan Jesu Keriso wanawananaaim. <sup>7</sup> Saise bosiyasiyaramaim tayamutufurit tanan i nowan tatamar ma'ama wanatowan isan nuhit tafot tatama. <sup>8</sup> Tur etei au'uwi i turobe anababatun, ayu akokok inakubuna gewas, saise sabuw God tibitumitum hinakakaf bowabow gewasin hinasinap. Sawar iti etei i gewasih naatu orot babin etei boro hai ma gewasin nitih; <sup>9</sup> ◊baise ofafar isah baikoko'aw obosabosa, ginyow naatu gamin baiyow i kwanahaiw, anayabin nati sawar i hai yabin en orot babin hai ma boro ni'afiy. <sup>10</sup> ◊Kou'obo'obowayan orot wantoro'ot kwanimatanuw, naatu bairou'abin iban kwanimatanuw maiye, nati ufunamaim kwanahaiw. <sup>11</sup> O iso'obaka nati orot i ikwaris naatu taiyuwin ana kakafinamaim ubar itin.

---

<sup>◊</sup> **3.5:** 2Tim 1.9; Hib 10.22    <sup>◊</sup> **3.6:** Act 2.17-18    <sup>◊</sup> **3.9:** 2Tim 2.14, 16    <sup>◊</sup> **3.10:** Mat 18.15-17

*Paul Ana Tur Yomanin*

<sup>12</sup> <sup>◊</sup>Artemas o Tychicus o isa aniyafar nan biya natitit ana mar, saife'ewat a ef inanuwet inan Nicopolis imaim ana ma'am biyau inatit. Anayabin ayu au not abogaigwas yakukur ana veya boro nati'imaim anama. <sup>13</sup> <sup>◊</sup>Zenas, ofafar so'obayan naatu Apollos hairi hai ef remor isan sawar etei ana fofonin inibaisih saise hinanan efamaim men sawar ta isan hiniyababan. <sup>14</sup> <sup>◊</sup>Naatu ata sabuw hiyasairih bowabow gewasin sinaf isan ana ef hinaso'ob naatu hinan baibaisayah gewasih hinamatar, saise hai yawas men nan ro'on en namataramih. <sup>15</sup> Au tur yomanin, sabuw iyab iti bairi ama'am a merar teiyi. Naatu sabuw iyab bairit ata baitumatum ta'immon tibiyabuwit hai merar ayiy. Manaw kabeber kwa etei isan nama.

---

<sup>◊</sup> **3.12:** Eph 6.21-22; Col 4.7-8    <sup>◊</sup> **3.13:** Act 18.24; 1Cor 3.5-6  
<sup>◊</sup> **3.14:** Eph 4.28

**TUR GEWASIN O BAIBASIT BOUBUN  
The New Testament in the Miniafia Language of Oro  
Province, Papua New Guinea  
Nupela Testamen long tokples Miniafia long Niugini.**

Copyright © 2009 anonymous

Language: Miniafia

Translation by: anonymous

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-04-14

---

PDF generated using Haiola and XeLaTeX on 11 Nov 2022 from source files  
dated 22 Nov 2019

5471f863-6a22-550f-8aac-b73746f2cc92